

OHR poziva Skupštinu kantona 7 da nominira delegate za Dom naroda FBiH



Na sastanku sa zvaničnicima Ureda visokog predstavnika (OHR), održanom jutros u Mostaru, predstavnici svih stranaka izabranih u Skupštinu Hercegovačko-neretvanskog kantona dogovorili su da će narednu sjednicu Skupštine kantona održati 17. januara. OHR očekuje da će nakon ove sjednice spisak nominiranih delegata iz Kantona 7 za Dom naroda FBiH biti poslat na verifikaciju u Centralnu izbornu komisiju BiH.

Hercegovačko-neretvanski kanton je jedini kanton koji nije otpočeo proces kojim će se finalizirati izbor delegata u Dom naroda Parlamentarne skupštine Federacije Bosne i Hercegovine. OHR s pažnjom prati razvoj situacije u Hercegovačko-neretvanskom kantonu.

“Delegati u Skupštini i političke stranke koje oni predstavljaju imaju odgovornost da osiguraju da su zakonski uslovi koji se vezuju za njihove funkcije u potpunosti ispunjeni; međutim, jasno je da ovo trenutno nije slučaj”, izjavio je danas prvi zamjenik visokog predstavnika Larry Butler. “Stalne prepirke oko toga koja stranka može da uđe u vladajuću većinu nije dovoljan razlog da se riskira izbijanje ozbiljne fiskalne krize i da se kao taoci drže velike grupe građana koji zavise od osoba koje su izabrale da se brinu za njihovo blagostanje”.

Opasnost od izbijanja fiskalne krize u FBiH javila se kao rezultat neusvajanja budžeta za 2007. godinu. Privremena odluka o finansiranju mogla bi premostiti ovu prazninu, ali stari saziv Doma naroda FBiH ne može usvojiti odluku o privremenom finansiranju. Prema tome, kantonalne skupštine moraju biti konstituirane da bi Parlament FBiH mogao spriječiti ovu krizu.

Po Ustavu FBiH, Dom naroda mora održati sjednicu u roku od dvadeset dana nakon objavljivanja izbornih rezultata. OHR očekuje sazivanje sjednice Doma naroda čim budu ovjereni mandati za dovoljan broj delegata da se postigne kvorum.

Današnjem sastanku prisustvovali su Omer Čevra i Salko Sokolović (SDA); Ljubo Zovko i Stjepan Krasić (HDZ BiH); Ivan Zelenčić i Josip Merdžo (HDZ 1990); Željko Asić (HSP Đapić-Jurišić); Mili Huseinagić (SBiH); Huso Kapić (SDP) i Omer Mićijević (BPS).